

**Inatsisartut aalajangiiffigisassaattut siunnersuutigineqarpoq Inatsisartut Siulittaasoqarfiat peqquneqassasoq Inatsisartut suleriaasiannut allannguutissamik saqqummiusseqqullugu, Naalakkersuisuni siulittaasup, siusinnerusukkut malittarisassat pissusaattut, Naalakkersuisut sinnerisa oqaaseqarnissaminut killilersorneqarnerat attornagu, sukkuulluunniit oqaaseqarnissaminut piumasaqarsinnaanngorlugu. Tamanna pillugu siunnersuutigineqarpoq Inatsisartut Suleriaasianni aalajangersakkamik ima nipilimmik ikkussisoqassasoq: ”Naalakkersuisut Siulittaasuat oqaaseqarnissaminik kissaateqaruni sukkuulluunniit oqaaseqarumalluni piumasaqarsinnaavoq”.**

(Siumup, Demokraatit Atassutillu Inatsisartunut ilaasortaataat)

### **pillugu**

#### **Suleriaatsimut Ataatsimiititaliap**

#### **siunnersuutip aappassaaneernejarneranut**

#### **ISUMALIUTISSIISSUTAA**

Ataatsimiititaliap suliarinninnermini ilaasortarai:

Inatsisartunut ilaasortaq Lars-Emil Johansen, Siumut, siulittaasoq  
Inatsisartunut ilaasortaq Agathe Fontain, Inuit Ataqtigiit, siulittaasup tullia  
Inatsisartunut ilaasortaq Mimi Karlsen, Inuit Ataqtigiit  
Inatsisartunut ilaasortaq Ane Hansen, Inuit Ataqtigiit, siulittaasup tullia  
Inatsisartunut ilaasortaq Debora Kleist, Inuit Ataqtigiit  
Inatsisartunut ilaasortaq Justus Hansen, Demokraatit  
Inatsisartunut ilaasortaq Randi V. Evaldsen, Demokraatit  
Inatsisartunut ilaasortaq Ineqi Kielsen, Siumut  
Inatsisartunut ilaasortaq Steen Lynge, Atassut  
Inatsisartunut ilaasortaq Mala Høy Kuko, Atassut  
Inatsisartunut ilaasortaq Anthon Frederiksen, Partii Naleraq  
Inatsisartunut ilaasortaq Henrik Fleischer, Partii Naleraq

#### **Aallaqqaasiut**

Siunnersuutikkut Siulittaasoqarfik peqquneqarpoq suleriaatsip allanngortinneqarnissaanut siunnersuuteqaqqullugu, ”Naalakkersuisut siulittaasuat, siusinnerusukkut malittarisassat pissusaattut, Naalakkersuisut sinnerisa oqaaseqarnissaminut killilersorneqarnerat attornagu, sukkuulluunniit oqaaseqarnissaminut piumasaqarsinnaanngorlugu”.

Aalajangiiffigisassatut siunnersuut matumani saqqummiunneqartoq Siumut, Demokraatit Atassutillu Inatsisartunut ilaasortaataannit peqatigiilluni saqqummiunneqarpoq.

Aalajangiiffigisassatut siunnersuut manna ulloq 11. oktober 2016 Inatsisartuni siullermeerneqarnermini Suleriaatsimut Ataatsimiititaliamut suliareqqitassatut innersuunneqarpoq.

### **Siunnersuutip pingaarnert imarisai siunertaalu**

Aalajangiiffigisassatut siunnersuummi siusinnerusukkut oqaaseqarsinnaanermut malittarisassat 2008-meersut innersuussutigineqarput. Taamanikkut piffissanut oqaaseqarfiusinnaasunut aallaaviit piumasaqaatillu allaasimapput, maannalu tassa suleriaatsimi piffissat oqaaseqarfiusinnaasut pillugit malittarisassani atuuttuni allaasunilu eqquteqqinneqarnissaat kissaatigineqarluni, Naalakkersuisut siulittaasuat sukkulluunniit oqaaseqarnissaminut piumasaqarsinnaanngorlugu.

### **Siunnersuutip Inatsisartuni siullermeerneqarnera**

Siullermeerinninnermi erserpoq siunnersuut partiinit tamanit attaviitsumillu Per Rosing Petersenimit, tamarmik siunnersuummik taama isikkoqartillugu tapersiisunit, taparserneqarpoq.

### **Ataatsimiititaliap siunnersuummik suliarinninnera**

#### *Piffissat oqaaseqarfiusinnaasut atuuttut*

Aallaqqaasiutigalugu ataatsimiititaliap oqaatigissavaa aalajangiiffigisassatut siunnersuummi saqqummiunneqartumi erseqqinnerusumik oqaatigineqanngimmat, siunnersuuteqartut siunnersuutip Inatsisartuni piffissanut oqaaseqarfiusinnaasunut atuuttunut qanoq atassuteqarnera isummerfigisimannngimmassuk, taamatullu aamma oqaatiginagu piffissat oqaaseqarfiusinnaasut pillugit malittarisassani atuuttuni naalakkersuisut siulittaasuata qaqugukkulluunniit oqaaseqarsinnaanissaa qanoq pisinnaassanersoq.

Piffissat oqaaseqarfiusinnaasut pillugit suleriaatsimut ilanngussami 1-imi piffissat Inatsisartut Naalakkersuisullu oqaaseqarfisinnaasaat takussutissiorneqarsimapput.

Piffissani oqaaseqarfiusinnaasuni atuuttuni aallaaviuvoq siunnersuutit oqaluttarfimmiit saqqummiunneqartarnissaat partiillu oqaaseqartuisa taakkununnga oqaluttarfimmit isummersortarnissaat, oqallinnerullu oqaluttarfimmi nikorfasumut sammisinneqartarnissaa, ataatsimiittarfimmi ilaasortat Naalakkersuisullu akornanni oqallinneruna.

Siunnersuut akissuteqaatillu saqqummiunneqareeraangata partiit tamarmik oqaaseqaateqarnissaminut periarfissaqarput, partiit tamarmik Naalakkersuisullu periarfissaqarlutik oqaaseqartumut pingasoriarlutik aperisinnaanissaminut.

Partiit oqaaseqartui tamarmik oqaaseqareeraangata, taamatullu aamma partiit

Naalakkersuisullu tamarmik oqaaseqartumut apeqquteqarnissaminnut periarfissaqareeraangata, siunnersuuteqartoq inaarutaasumik oqaaseqarsinnaatitaavoq. Tamatumani partiit tamarmik naalakkersuisullu aamma periarfissinneqarput siunnersuuteqartumut tamarmik immikkut marlunnik apeqquteqarnissamut, naggataatigullu Naalakkersuisut periarfissinneqartarlutik siunnersuummut inaarutaasumik oqaaseqarnissaminnut, tamatumani aamma partiit tamarmik Naalakkersuisullu inaarutaasumik marlunnik apeqquteqarsinnaallutik.

Tamanna isumaqarpoq Naalakkersuisut Siulittaasuat piffissanut oqaaseqarfiusinnaasunut malittarisassat atuuttut malillugit, partiillu naligalugit, periarfissaqarmat partiit oqaaseqartuinut tamanut pingasoriarluni kiisalu siunnersuuteqartup inaarutaasumik oqaaseqarneranut atatillugu marloriarluni apeqquteqarsinnaanissaminut, tassa Naalakkersuisunut ilaasortat allat Naalakkersuisut apeqquteqarnissamut periarfissaannik pingasoriarluni marloriarluniluunniit atuisimangippata.

*2008-mit malittarisassat siulittaasup qaqugukkulluunniit oqaaseqarsinnaaneranik imallit* Siunnersuuteqartut oqaaseqarsinnaanermut malittarisassat 2008-meersut innersuussutigalugit kissaatigaat naalakkersuisut siulittaasuata qaqugukkulluunniit oqaaseqarsinnaanissaminik piunasaqarsinnaanerata eqquteqqinneqarnissaa. Ataatsimiititaliap takusinnaavaa oqaaseqarsinnaanermut malittarisassatoqqat malillugit Inatsisartuni saqqummiussisarnerit taamanikkut allatut aqqissuussaallutillu iluseqartut. Oqaaseqarsinnaanermut malittarisassat 2008-meersut naapertorlugit siunnersuuteqartup massakuttut siunnersuutini saqqummiuteqqaartarpa. Tamatuma kingorna Naalakkersuisut tamatumunnga akissuteqaateqartarput. Tamatuma kingorna partiit oqaaseqartuisa tamarmik oqaaseqaatissatik tulleriissiinnarlugit saqqummiuttarpaat, tamatumalu Inatsisartuni oqaaseqaataasut tamaasa pillugit nalinginnaasumik oqallittoqartarluni, kikkut tamarmik killeqanngitsumik oqaaseqarsinnaallutik.

Tamatumunnga atatillugu taamanikkullu oqaaseqarsinnaanermut malittarisassat malillugit naalakkersuisut siulittaasuata qaqugukkulluunniit oqaaseqarnissamik piunasaqarsinnaanera oqaaseqarsinnaanermut malittarisassat eqqarsaatigalugit ajornartorsiutaasimangilaq, tassami ilaasortat tamarmik siulittaasup oqaaserisaanut akissuteqarsinnaasimmata.

Taamanikkut piffissat oqaaseqarfiusinnaasut taamatuttaaq ullumikkut partiinit tamanit apeqqutinut pingasunut killilerneqarsimangilaq, ilaasortalli tamarmik namminneq kissaatigisartik tunngavigalugu oqaaseqarsinnaatitaallutik.

Piffissat oqaaseqarfiusinnaasut pillugit malittarisassat atuutsillugit aalajangiiffigisassatut siunnersuut timitalerneqassagualarpat, tamanna piffissat oqaaseqarfiusinnaasut atuuttut eqqarsaatigalugit ataatsimiinnermik aqutsisumut ajornartorsiutinik pilersitsisussaavoq, partiit oqaaseqartuisa akornanni maannaanaq naalakkersuisut siulittaasuat oqaaseqarnissaminik piunasaqassagualarpat. Eqqarsaatigineqarsinnaavormi partiit ilaasa taamaalinerani oqaaseqarsinnaanermut periarfissatik tamaasa atoreeraat taamalu naalakkersuisut

siulittaasuata oqaaserisaanut akissuteqarsinnaassanatik, soorlu aamma piffissat oqaaseqarfiusinnaasut eqqarsaatigalugit apeqqutit pineqartut sammisinnegartartussaasut kimut oqaluttarfimmit oqaaseqartumut, nalinginnaasumik Inatsisartunut ilaasortat akornanni oqallinnermuunngitsoq.

Suleriaatsimi piffissanut oqaaseqarfiusinnaasunut malittarisassat atuuttut allanngortinneqassappata, paaseqqaarneqartariaqarpoq sunut atatillugu piffissallu oqaaseqarfiusinnaasut atuuttut aallaavigalugit siunnersuuteqartut naalakkersuisut siulittaasuata qaqugukkulluunniit oqaaseqarsinnaatitaaneramik malittarisassamik eqqusseqqinnissaq qanoq kissaatigeneraat. Taamatuttaaq paaseqqaarneqartariaqarpoq tamanna aamma malitseqassanersoq ilaasortat partiilluunniit tamarmik aamma apeqquteqaqqinnissaminut oqaaseqaqqinnissaminnulluunniit periarfissinneqarnerinik, taamatut naalakkersuisut siulittaasuata oqaaseqarnissaminut periarfissanik amerlaneramik tunineqassappat, imaluunniit tamanna taamaallaat oqaaseqartumut oqaluttarfimmiittumut sammisinnegassanersoq, aallaavittut killilernagu qanoq amerlatigisunik pineqartoq apeqquteqarfigneqarsinnaanersoq. Taamatuttaaq paaseqqaarneqartariaqarpoq naalakkersuisut siulittaasuata oqaaseqarsinnaanissaminut killeqanngitsumik periarfissinneqassanersoq, partiit oqaaseqartuinit tamanut malittarisassat malillugit pingasunik apeqquteqarnissamut Naalakkersuisut ullumikkut periarfissareriigaasa saniatigut.

Ataatsimiititaliap naatsorsuutigaa suliassaq erseqqinnerusumik qulaajarneqarumaartoq suleriaatsimi piffissanut oqaaseqarfiusinnaasunut malittarisassat allanngortinneqarnissaannut siunnersuummik siulittaasoqarfiup saqqummiussaqaqarneratigut.

#### **Siunnersuutip aningaasatigut kingunerisassai**

Siunnersuummut nassuiaatini siunnersuutip aningaasatigut kingunerisinnaasaatut oqaatigineqartut apeqqusissallugit tunngavissaqarpassinngilaq.


#### **Ataatsimiititaliap inassuteqaatai**

Tamanna tunngavigalugu ataatsimiititaliap isumaqatigiittup siunnersuutip akuerineqarnissaa inassutigaa.

Taamatut oqaaseqarluni isumaliutissiisummilu oqaatigineqartutut paasinnilluni ataatsimiititaliap matumuuna siunnersuut aappasaaniigassanngortippaa.

  
(Siulittaasoq)

  
\_\_\_\_\_

  
\_\_\_\_\_

  
\_\_\_\_\_

  
\_\_\_\_\_

  
\_\_\_\_\_

  
\_\_\_\_\_

\_\_\_\_\_